

Վարչական տույժ նշանակելու մասին

«22» ապրիլի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով մաքսային ձևակերպումների մասնագետ Ռուբեն Պողոսի Հակոբյանի վերաբերյալ նյութերը.

Պ Ա Ր Զ Ե Ց Ի

ՀՀ ՊԵԿ հետքացթողումային հսկողության վարչության աշխատակիցները, ղեկավարվելով Եվրասիական տնտեսական միության մաքսային օրենսգրքի 333-րդ և «Մաքսային կարգավորման մասին» ՀՀ օրենքի 133-րդ հոդվածներով, իրականացրել են արտագնա մաքսային ստուգում «Սոնա Սաֆարյան» Ա/Ձ-ում և հայտնաբերել, որ «Սոնա Սաֆարյան» Ա/Ձ-ի անվամբ 16.04.2018թ. թիվ 05100010/160418/0017976 և 16.05.2018թ. թիվ 05100010/160518/0023791 ապրանքների հայտարարագրով ԵԱՏՄ ԱՏԳ ԱԱ 8425 42 000 0 ծածկագրով հայտարարագրված «Ա/մ-ի հիդրավիկ ամբարձիչ /դոմկրատ/ SA-40» նկարագրությամբ ապրանքները հայտարարագրվել են ծածկագրի վերաբերյալ ոչ ճշգրիտ տեղեկություններով:

«Սոնա Սաֆարյան» Ա/Ձ-ում իրականացված մաքսային ստուգման ընթացքում պարզվել է, որ հայտարարագրված ապրանքները հանդիսանում են ավտոտնակներում օգտագործվող ստացիոնար վերհաններ:

ՀՀ ՊԵԿ մաքսային հսկողության վարչության 11.03.2021թ. «Ապրանքի ոչ ճիշտ դասակարգում հայտնաբերելու դեպքում ապրանքի դասակարգման վերաբերյալ» թիվ ԱԴՈ-21-000030 որոշման համաձայն՝ ավտոտնակներում օգտագործվող ստացիոնար վերհան ապրանքատեսակը ենթակա է դասակարգման ԵԱՏՄ ԱՏԳ ԱԱ 8425 41 000 0 ծածկագրով (մաքսատուրքի դրույքաչափը հայտարարագրերի գրանցման օրերի դրությամբ 5%):

Իրականացված արտագնա մաքսային ստուգման արդյունքում 16.03.2021թ. կազմվել է թիվ 0103-Ա ակտը և «Սոնա Սաֆարյան» Ա/Ձ-ին առաջարկվել է կատարել վերահայտարարագրում ԵԱՏՄ ԱՏԳ ԱԱ ճշգրիտ ծածկագրերին համապատասխան՝ վճարելով պակաս վճարված մաքսային վճարները: Արտագնա մաքսային ստուգման նյութերն ուղարկվել են ՀՀ ՊԵԿ իրավաբանական վարչություն մաքսային կանոնների խախտման հատկանիշների հարցը պարզելու համար:

Նյութերի ուսումնասիրման արդյունքում պարզվել է, որ 16.05.2018թ. թիվ 05100010/160518/0023791 ապրանքների հայտարարագիրը ներկայացրել է Ռուբեն Պողոսի Հակոբյանը: 2021 թվականի մարտի 26-ին ՀՀ ՊԵԿ իրավաբանական վարչությունում Ռուբեն Պողոսի Հակոբյանի նկատմամբ ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության հատկանիշներով կազմվել է մաքսային կանոնների խախտման վերաբերյալ արձանագրություն, որի մեկ օրինակն ուղարկվել է նրան:

Ռուբեն Պողոսի Հակոբյանը բացատրություն է տվել այն մասին, որ «Սոնա Սաֆարյան» Ա/Ձ-ի անվամբ 16.05.2018թ. թիվ 05100010/160518/0023791 ապրանքների հայտարարագրով ՀՀ ներմուծված «Ա/մ-ի հիդրավիկ ամբարձիչ» նկարագրությամբ ապրանքը հայտարարագրել է ID 430 առ 15.05.2018թ. հաշիվ-ապրանքագրի և արտահանման հայտարարագրի հիման վրա, որոնցում նշված է եղել ԵԱՏՄ ԱՏԳ ԱԱ 8425 42 900 0 ծածկագիրը: Միաժամանակ հայտնել է, որ «Սոնա Սաֆարյան» Ա/Ձ-ի կողմից գրավոր տեղեկատվություն չի տրամադրվել, մինչդեռ Սոնա Սաֆարյանը բանավոր կարգով հայտնել է, որ ներմուծված ապրանքը ա/մ-ի վերհանման համար է նախատեսված և օգտագործվում է ավտոտեխսպասարկման կետերում՝ հանդիսանալով ավտոտնակների ամբարձիչներ: Հավելել է, որ Սոնա Սաֆարյանը ապրանքի նկարագրի վերաբերյալ տեղեկություն է տրամադրել և վերջինիս տեղեկացրել է, որ փաստաթղթերում նշված ծածկագրով

հայտարարագրելիս հնարավոր է ծածկագրի անճշտություն ստեղծվի, ինչպես նաև փաստաթղթերում նշված ԵԱՏՄ ԱՏԳ ԱԱ 84254290000 ծածկագրի փոխարեն նշվել է 8425420000 ծածկագիրը, քանի որ համակարգում առկա չի եղել փաստաթղթերում նշված ծածկագիրը:

22.02.2018թ. մաքսային միջնորդական ծառայությունների մատուցման պայմանագրի 2.4 կետի համաձայն՝ պատվիրատուն պարտավոր է նախքան ԲՄՀ-ի կազմման գործընթացը սկսելը կատարողին ներկայացնել ՀՀ մաքսային սահմանը հատած, հայտարարագրվող բեռի վերաբերյալ հավաստի և ճշգրիտ տեղեկություններ, բեռի վերաբերյալ բնօրինակ փաստաթղթերը, իսկ բեռի ժամանելուց հետո անհրաժեշտության դեպքում՝ ՀՀ մաքսային մարմիններում գործող ընթացակարգերով կամ այլ ընդունելի եղանակով ստանալ և ներկայացնել նոր, ճշգրտված փաստաթղթեր, ինչպես նաև գրավոր և/կամ բանավոր հայտնել հավաստի և ամբողջական տեղեկություններ հայտարարագրվող յուրաքանչյուր ապրանքատեսակի անվանման, նկարագրի, բնութագրի, ԱՏԳ ԱԱ ծածկագրի վերաբերյալ:

Հետբացողումային հսկողության վարչությունում անհատ ձեռնարկատեր Սոնա Սաֆարյանը բացատրություն է տվել այն մասին, որ ներմուծված ապրանքները հանդիսանում են ավտոտնակների ստացիոնար ամբարձիչներ, որոնք հիմնականում օգտագործվում են ավտոտեխսպասարկման կետերում և էլեկտրոհիդրավիկ շարժիչի միջոցով երկկողմանի բարձրացնում են ավտոմեքենաները: Ամբարձիչների քաշը 578 կգ է, բարձրացնում է 4 տոննա:

ԵԱՏՄ մաքսային օրենսգրքի (այսուհետ՝ Օրենսգիրք) 2-րդ հոդվածի 32-րդ կետի համաձայն՝ «մաքսային հայտարարագիրը» մաքսային փաստաթուղթ է, որը պարունակում է տեղեկություններ ապրանքների վերաբերյալ կամ ապրանքների բացթողման համար անհրաժեշտ այլ տեղեկություններ, իսկ 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ: 35-րդ կետի համաձայն՝ մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ և (կամ) ապրանքների բացթողման համար անհրաժեշտ այլ տեղեկությունների հայտագրումն է:

Օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցչի կողմից, եթե սույն օրենսգրքով այլ բան սահմանված չէ: ԵԱՏՄ մաքսային օրենսգրքի 105-րդ հոդվածի համաձայն՝ մաքսային ընթացակարգերով ձևակերպելիս, բացառությամբ «մաքսային տարանցում» մաքսային ընթացակարգի, մաքսային մարմին է ներկայացվում ապրանքների մասին հայտարարագիր: ԵԱՏՄ մաքսային օրենսգրքի 106-րդ հոդվածով սահմանվում են ապրանքների հայտարարագրերում նշման ենթակա տեղեկությունները: 106-րդ հոդվածի հոդվածի 1-ին մասի 4-րդ կետի համաձայն՝ հայտարարագրում նշվում են տեղեկություններ ապրանքների մասին, որոնց մեջ ի թիվս այլոց նշվում է անվանումը, նկարագրությանը, որն անհրաժեշտ է այն մաքսային վճարների, հատուկ, հակազնագցման, փոխհատուցման տուրքերի և այլ վճարների հաշվարկման և գանձման համար, ապրանքների ծածկագիրը՝ Արտաքին տնտեսական գործունեության ապրանքային անվանացանկին համապատասխան:

Օրենսգրքի 20-րդ հոդվածի 1-ին և 4-րդ մասերի համաձայն՝ հայտարարատուն և այլ անձինք ապրանքների դասակարգումն իրականացնում են ԱՏԳ ԱԱ-ին համապատասխան՝ մաքսային հայտարարագրման ժամանակ և այն դեպքերում, երբ մաքսային կարգավորման ոլորտի միջազգային պայմանագրերի ու ակտերի համաձայն, մաքսային մարմին են հայտնում ապրանքի ծածկագիրը՝ Արտաքին տնտեսական գործունեության ապրանքային անվանացանկին

համապատասխան: Առևտրային, տրանսպորտային (փոխադրման) և (կամ) այլ փաստաթղթերում, ինչպես նաև եզրակացություններում, տեղեկանքներում, փորձագիտական հիմնարկների կողմից տրվող փորձաքննության արձանագրություններում նշված ապրանքների ծածկագրերը պարտադիր չեն ապրանքների դասակարգման համար:

Օրենսգրքի 404-րդ հոդվածի 1-ին մասի համաձայն՝ մաքսային գործառնություններ իրականացնելիս մաքսային ներկայացուցիչն ունի նույն իրավունքները, որոնք ունի այն անձը, որը լիազորում է նրան ներկայացնելու իր շահերը մաքսային մարմինների հետ փոխհարաբերություններում: 405-րդ հոդվածի 1-ին մասի 6-րդ կետի համաձայն՝ մաքսային ներկայացուցիչը պարտավոր է կատարել սույն Օրենսգրքով սահմանված և (կամ) անդամ պետությունների՝ մաքսային կարգավորման վերաբերյալ օրենսդրությամբ սահմանվող այլ պարտականություններ:

Օրենսգրքի 84-րդ հոդվածի 3-րդ կետի համաձայն՝ հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու համար:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում առաջանում է մաքսային վճարների պակաս հաշվարկում կամ չհաշվարկում, առաջացնում է տուգանք՝ այդ մաքսային վճարների 50 տոկոսի չափով:

ԵՏՀ խորհրդի 16.07.2012 N54 որոշման համաձայն՝ ԵԱՏՄ ԱՏԳ ԱԱ 8425 41 000 0 ծածկագրով ենթակա են դասակարգման ավտոտնակներում օգտագործվող ստացիոնար վերհանները:

Մաքսային կանոնների խախտումների վերաբերյալ վարույթի շրջանակում հաստատվել է այն հանգամանքը, որ մաքսային ձևակերպումների մասնագետ Ռուբեն Պողոսի Հակոբյանը ապրանքների հայտարարագրին կից ներկայացված փաստաթղթերի ուսումնասիրությունից և Սոնա Սաֆարյանի կողմից տրամադրված տեղեկատվության հիման վրա կարող էր պարզել, որ ներմուծված սարքավորումները հանդիսանալով ստացիոնար վերհաններ ենթակա են դասակարգման ԱՏԳ ԱԱ 8425 41 000 0 ծածկագրով:

Մաքսային ձևակերպումների մասնագետ Ռուբեն Պողոսի Հակոբյանը 2021 թվականի ապրիլի 22-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի իր բացակայությամբ:

Այսպիսով, գործի նյութերով պարզվել է, որ «Սոնա Սաֆարյան» Ա/Ձ-ի անվամբ 16.05.2018թ. թիվ 05100010/160518/0023791 ապրանքների հայտարարագրով ՀՀ ներմուծված և փաստացի ԵԱՏՄ ԱՏԳ ԱԱ 8425 41 000 0 ծածկագրով դասակարգվող ապրանքները մաքսային ձևակերպումների մասնագետ Ռուբեն Պողոսի Հակոբյանը հայտարարագրել է ոչ ճշգրիտ ԵԱՏՄ ԱՏԳ ԱԱ 8425 42 000 0 ծածկագրով, ինչի հետևանքով առաջացել են 87114 ՀՀ դրամի չափով պակաս հաշվարկված մաքսային վճարներ, այսինքն՝ Ռ. Հակոբյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ նախատեսված մաքսային կանոնների խախտում, ինչը հիմնավորվում է ՀՀ ՊԵԿ մաքսային հսկողության վարչության 11.03.2021թ. «Ապրանքի ոչ ճիշտ դասակարգում հայտնաբերելու դեպքում ապրանքի դասակարգման վերաբերյալ» թիվ ԱԴՈ-21-000030 որոշմամբ, 16"03.2021թ. թիվ 0103-Ա ակտով, 16.05.2018թ. թիվ 05100010/160518/0023791 Ա/Հ-ով:

Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ, 206-րդ և 221-րդ հոդվածներով,

Ո Ր Ո Շ Ե Ց Ի՝

1. Ռուբեն Պողոսի Հակոբյանին (անձնագրի համար՝ AN0376476) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ և նրան տուգանել պակաս հաշվարկված մաքսային վճարների հիսուն տոկոսի չափով՝ 43557 ՀՀ դրամ: /900005024055 (կող-19) հաշվեհամարին

2. Որոշման մասին հայտնել Ռ. Հակոբյանին՝ պարզաբանելով, որ ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ այն կայացնելուց հետո 10 օրվա ընթացքում կամ Վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՑԱԿԱՆՅԱՆ